

Ex polis y politico, sr. Allan Howell

“Mi no a drenta politica pa pret”

ORANJESTAD - Ex polis y politico, sr. Allan Howell a anuncia su retiro for di partido AVP. Howell tabata e candidato number 27 riba lista di e partido berde den eleccion ultimo di 2013.

“Ma retira completamente di partido”, el a bisa. Tambe el a laga sa cu e no a sigui mas den su funcion como consehero di minister Mike de Meza. Tambe el a indica cu ta berdader cu diferente partido a acerca su persona, ya nan ta mira su cualidad y potencial como un persona hoben den politica cu tin e gana di traha. Howell a abstene di menciona e nomber di e partidonan, pero actualmente tin un partido cu e ta “hopi mas cerca di dje”. Nan ta den proceso di combersacion hunto cu su seguidonan. “Un cos ta sigur! Mi seguidonan no kier wak mi bay bek mi trabou”, el a bisa.

Den ambiente politico ta wordo bisa cu Howell lo ta bayendo cu partido POR pa cual a acerca un di e lidernan di e partido, Otmar Oduber. Oduber su reaccion tabata corto, pero a bisa: “Nos ta papiando. Tin hopi potencial, pero no wordo reconoci. Lo por ta sigur un bon adkision pa E Forsa Nobo su team”.

Decision politico

El a bisa cu su decision pa

drenta politica tabata pa bin cu cambio pa beneficio di pueblo di San Nicolas y henter comunidad di Aruba. A pesar cu el a haya e delaster number riba e lista di AVP “tur hende sa cu mi a haya un bon resultado”. Te hasta e ta considera cu el a kibra un record, ya cu pa prome biala un candidato cu e delaster number di e lista, a logra 422 voto den un luna di campaña. Mientras cu sumo respet e ta haya cu e averahe di otro candidatonan cu awendia ta den Parlamento, no a yega na e cifra aki.

El a recorda cu no tabata un decision facil ora cu lider di partido AVP, sr. Mike Eman a ofrece pa join cu AVP y drenta area politico; ya cu el a mira su potencial pa haci algo pa comunidad. Te hasta e mester consulta prome su hendenan di su bario y San Nicolas, colega, amigonan y famia y asina el a dicidi di tuma e reto pa bay AVP. Sinembargo e ta consciente cu ora un lider di partido ta traha su lista, e sa exactamente “friamente calcula” kende nan lo bay hinca den Parlamento.

P’esey ayera den un forma determina, Howell a declara cu despues di sinta na mesa varios biala cu e lider di partido AVP, e no ta wak cu den AVP tin futuro p’e. El a acerca e lider di partido y durante un “bon combersacion y den bon ambiente”, e no a sinti un sentimento di seguridad

riba su rol den partido AVP pa e siguiente eleccion.

Pues e ta considera cu si e no tin un rol mas activo, no tin motibo mas pa e ta den politica cu partido AVP. Howell ta kere cu e tin mas potencial como politico, ya cu e no a drenta den politica pa wega. E reto cu e tabatin a base di su formacion y preparacion den cuerpo policial tabata pa trece un diferencia pa San Nicolas y Aruba den general.

Diferencia den politica

Sinembargo e ta lamenta cu e no a logra su meta. Su meta tabata esun di por a bira parlamentario pa trece cambionan; y atende cu diferente cosnan particularmente cu e hendenan humilde. Ya cu e ta sigur cu e por haci un trabou 100% mas miho cu hopi parlamentario, specialmente riba tereno di husticia, deporte, social, etc..

“Mi no a drenta politica pa pret. Mi a drenta politica pa mi haci e diferencia den comunidad”, el a bisa.

P’esey el a dicidi di no sigui mas como politico di AVP. Ademas el a indica cu su votadonan ta dispuesto di sostene su candidatura; pero no den e mesun situacion cu a sosode den eleccion ultimo cu ne. Igualmente durante e cuater ultimo aña el a sinti lamentablemente cu seguido por a monitor cu e partido no a muestra un plan concreto



riba ki rol e lo hunga den e siguiente eleccion. “Mi no a drenta den politica pa cos. Mi no a drenta politica pa trabou. Mi tin un funcion pa 23 aña caba den cuerpo policial...”, el a bisa.

Na final el a gradici tanto lider di AVP pa e oportunidad brinda y tambe na minister Mike de Meza kende a dun’e e oportunidad pa traha den su ministerio y asina adkiri experiencia.